

初

潭

集

初潭集卷之十三

師友三

一爲文

枚○皐○文○章○敏○捷○長○卿○制○作○淹○遲○皆○盡○一○時○之○譽○而○長○卿○首○尾○溫○麗○枚○皐○時○有○累○句○揚○子○雲○曰○軍○旅○之○際○戎○馬○之○間○飛○書○馳○檄○用○枚○皐○廊○廟○之○下○朝○廷○之○中○高○文○典○冊○用○相○如○說○得○是○

同馬相如爲上林子虛賦意思蕭散不復與外事相

關控引天地錯綜古今忽然而睡漠然而興幾百日
而後成友人盛覽嘗問以作賦相如曰合綦組以成
文列錦繡而爲質一經一緯一商一宮此賦之迹也
賦家之心包括宇宙總覽人物斯乃得之於內不可
得而傳
說得是

8
木華字玄虛玄虛爲海賦文章雋麗足繼前良後張
融亦作海賦賦曰窮區沒渚萬里藏岸湍轉則日月
似驚浪動則星河如覆却瞻無後向望何前長尋高

眺唯水與天、

○張融爲海賦文辭詭激獨與衆異後以示鎮軍將軍
徐凱之凱之曰卿此賦實超玄虛但恨不道鹽耳融
卽求筆增曰漉沙搆白熬波出素積雪中春飛霜暑
路、

○魏武帝常使阮瑀作書與韓遂時帝適近出瑀隨從
因於馬上具草呈之帝擘筆欲有所定而竟不能損
益、

樂令善於清言而不長於手筆將讓河南尹請潘岳

爲表潘云可作耳要當得君意樂爲述已所以爲讓
標位二百許語潘直取錯綜便成名筆時人咸云若
樂不假潘之文潘不取樂之旨則無以成斯矣

太叔廣甚辯給而摯仲治長於翰墨俱爲列卿王隱
晉書曰摯虞少好學師事皇甫謐永嘉五年洛中大
饑遂餓而死虞與廣名位略同廣長口才虞長筆才
衆坐廣譚虞不能對退虞筆難廣廣不能答於是更
相嗤笑紛然於世廣無可記虞多所錄於斯爲勝也
李○生○喜○也○

江左殷太常父子並能言理亦有辯訥之異揚州口
談至劇太常輒云汝更思吾論

○郭景純詩云林無靜樹川無停流阮孚云泓嶢蕭瑟
實不可言每讀此文輒覺神超形越

○庾闡始作楊都賦道溫庾云溫擬義之標庾作民之
望方響則金聲比德則玉亮庾公聞賦成求看兼贈
賦之闡更改望爲儁以亮爲潤云

○謝公云金谷中蘇紹最勝紹是石崇姊夫金谷詩叙
曰余以元康六年從太僕卿出爲使持節監青徐諸

軍事征虜將軍有別廬在河南縣界金谷澗中或高
或下清泉茂林衆果竹栢藥草之屬莫不畢備又有
水碓魚池土窟其爲娛目歡心之物備矣時征西大
將軍祭酒王詡當還長安余與衆賢共送往澗中晝
夜遊宴屢遷其坐或登高臨下或列坐水濱時琴瑟
笙筑合載車中道路並作及住令與鼓吹遞奏遂各
賦詩以叙中懷或不能者罰酒三斗感性命之不永
懼周○落○之○無○期○故○具○列○時○人○官○號○姓○名○年○紀○又○寫○詩○
著○後○後○之○好○事○者○其○覽○之○哉○凡○三○十○人○蘇○紹○字○世○嗣○

年五十爲首

王右軍得人以蘭亭序方金谷詩序又以已敵石崇
甚有忻色時在蘭亭右將軍司馬太原孫丞公等二
十六人各賦詩前餘姚令會稽謝勝等十五人不能
賦詩罰酒各三斗蘭亭序曰永和九年歲在癸丑暮
春之初會於會稽山陰之蘭亭修禊事也夫人之相
與俯仰一世或取諸懷抱悟言一室之內或因寄所
託放浪形骸之外雖趣舍萬殊靜躁不同當其欣於
所遇暫得於已快然自足不知老之將至及其所之

既倦情隨事遷感慨係之矣向之所欣俛仰之間以爲陳迹猶不能不以之興懷况脩短隨化終期於盡古人云死生亦大矣豈不痛哉每覽昔人興感之由若合一契未嘗不臨文嗟悼不能喻之於懷固知一死生爲虛誕齊彭殤爲妄作後之視今亦猶今之視昔也悲夫

王右軍少重惠二二年輒發動後答許掾詩忽復惡中得二十字云取歡仁智樂寄暢山水陰清冷澗下瀨歷落松竹林既醒左右誦之右軍嘆曰癡何預盛

德事耶

○桓宣武北征袁虎時從被責免官會須露布文喚素
倚馬前令作俄得七紙殊可觀東亭在側極嘆其才
袁虎云當令齒舌間得利

○袁宏始作東征賦都不道陶公胡奴誘之狹室中臨
以白刃曰先公勲業如是君作東征賦云何相忽略
宏窘蹙無計便答我大道公何以云無因誦曰精金
百鍊在割能斷功則治人職思靖亂長沙之勲爲史
所續

孫興公云潘文淺而淨陸文深而蕪又云潘文爛若披錦無處不善陸文若排沙簡金往往見寶又云三都二京五經鼓吹

孫興公作天台賦成以示范榮期云卿試擲地要作金石聲劉氏曰赤城霞起而建標瀑布飛流而界道此賦之佳處

袁虎少貧嘗爲人傭載運租謝征西經船行其夜清風朗月聞江渚間估客船上有謠詩聲甚有情致所誦五言又其所未嘗聞歎美不能已卽遣委曲訊問

乃是袁自詠其所作詠史詩因此相要大相賞得

桓宣武命袁彥伯作北征賦既成公與時賢共看咸
嗟嘆之時王珣在坐云恨少一句得寫字足韻當佳
袁卽於坐攬筆益云感不絕於余心泝流風而獨寫
公謂王曰當今不得不以此事推袁

或問顧長康君筆賦何如嵇康琴賦顧曰不賞者作
後出相遺深識者亦以高奇見貴

羊孚作雪贊賦資清以化乘氣以霏遇象能鮮卽潔

賦人相流遂以書扇

桓公見謝安石作簡文諡議看竟擲與坐上諸客曰
此是安石碎金

葛洪稱機文猶玄圃之積玉無非夜光五河之吐流
泉源如一其弘麗妍瞻英銳漂逸亦一代之絕乎

紀少瑜丹陽秣陵人才藻新拔嘗夢陸倕以一束青
鏤管筆授之云我此筆猶可用卿擇其善者文因邁
進

桓玄初并西夏領荆江二州二府一國於時始雪五
處俱賀五版竝入玄在廳事上版至卽答版後皆粲

然成章不相揉雜

○張率爲待詔賦梁武手敕答曰相如工而不敏枚臯敏而不工卿可謂兼二子於金馬矣

○夏竦字子喬幼學於姚鉉使爲水賦限以萬字竦作三千字以示鉉鉉怒不視曰汝何不於水之前後左右廣言之竦益之得六千字

○鮑照嘗謁臨川王義慶有人止之照曰千載上有英才異士沈沒不聞者安可數哉大丈夫豈可遂韜知能使蕭艾不辨終日碌碌與燕雀相隨乎於是奏詩

義慶天奇之

○張紘見柎榴枕愛其文作賦陳琳在北見之以示人
曰此吾鄉里張子綱所作後紘見陳琳作武庫賦應
機論與琳書深嘆美之琳答曰自僕在河北與天下
隔此間率少於文章易爲雄伯故使僕受此過善之
譚今景興在此足下與子布在彼所謂小巫見大巫
神氣盡矣

○王筠寓直詩霜被守宮槐風驚護門草護門草出常
山取置戶下或有過其門者草必叱之一名百靈草

顏延之嘗問鮑明遠已詩與謝康樂優劣鮑曰謝五言如初發芙蓉自然可愛君詩若鋪錦列繡亦雕繒滿眼湯惠休日謝詩如芙蓉出水顏如錯彩鏤金顏終身病之

鮑照文辭贍逸世祖時爲中書舍人世祖好爲文章自謂物莫能及照悟其旨故爲文多累句當時咸謂照才盡實不然也臨海王子璠爲荊州照爲前軍掌書記子璠敗照爲亂兵所殺

沈約每見王筠文嗟咨謂曰昔蔡伯喈見王仲宣稱

日王公之孫吾家書籍悉當相與僕雖不敏請附斯
言自謝眺諸賢零落平生意好殆絕不謂疲暮復逢
於君

說得可憐

徐之才嘗與朝士出遊遙望見犬競走諸人試令目
之之才卽應聲曰爲是宋鵲爲是韓盧爲逐李斯東
走爲負帝女南徂

王文海在會稽日境有雲門天柱山王常出遊累月
不返至若耶溪賦詩曰蟬噪林逾靜鳥鳴山更幽當

時以爲文外獨絕

○南齊世祖問王儉曰當今誰能爲五言詩儉曰謝朓得父膏腴江淹有意鍾嶸詩品曰文通詩體總雜善於摹擬筋力於王微成就於謝朓初罷宣城郡宿冶亭夢一美丈夫自稱郭璞謂淹曰吾有筆在卿處多年矣可以見還淹探懷中得五色筆以授之爾後爲詩不復成語故世傳江淹才盡

○柳惲少工篇什爲詩云亭臯木葉下壠首秋雲飛瑯

琊王融差賞因書白團扇

王仁裕喜爲詩少時嘗夢人剖其腸胃以西江水滌之顧見江中沙石皆爲篆籀之文由是文思竝進誰將腸胃灌江水沙石於今作篆文

梁簡文答新喻侯和詩書云垂示三首風雲吐於行間珠玉生於字裏跨躡曹左含超潘陸雙鬢向光風流已絕九梁插花步搖爲古高樓懷怨結眉表色長門下泣破粉成痕此皆性情卓絕親致英奇手持口誦喜荷交并

竟陵王嘗夜集學士刻燭爲詩四韻者則刻一寸以

此爲率蕭文琰日燒一寸燭而成四韻詩何難之有
乃與江洪等共叩銅鉢響絕則成詩皆可觀

薛道衡聘陳作人日詩云入春纔七日離家已二年
南人嗤之曰是底言誰謂此虜解作詩及云人歸落
鴈後思發在花前乃喜曰名下固無虛士

薛道衡每構文必隱坐空齋踞壁而卧聞戶外有人
便怒

庾信字子山新野人父有吾梁中書令信仕梁爲散
騎常侍聘於東魏文章辭令盛爲鄴下所稱元帝卽

位來聘遂留長安信雖位望通顯常有鄉關之思作
哀江南賦以致意

○溫子昇文章清婉陽夏守傅標使吐谷渾見其國主
床頭有書數卷乃子昇文濟陰王暉業嘗云江左文
人宋有顏延之謝靈運梁有沈約任昉我子昇足以
陵顏轅謝舍任吐沈

○崔信明自誇其文謂過李伯藥一日鄭世翼過之江
中謂曰聞公有楓落吳江冷願見其餘信明忻然多
出衆篇世翼一覽便曰所見不逮所聞投諸水引舟

而去。

祖士言深好奕棋。王處叔謂之曰：「古人遭時則以功達其道，不遇則以言達其才。故否泰不窮也。今天下傾覆舊事蕩滅，君少長王都，何不記述，使有裁成？」昔應仲遠作風俗通，崔子真作政論，蔡伯喈作勸學篇，史游作急就章，便爲沒而不朽。當其同時，人豈少哉？而皆無聞由無述作也。故君子疾沒世而不稱，而國史明乎得失之迹。

金華集卷之八 則人自課庵一文必三草十年後悟其

淺近盡付於火。生○平○凡○三○焚○文○集○

王勃所至請托爲文金帛豐積人謂心織舌耕每爲
碑頌先磨墨數升引被掩面而卧忽起一筆書之初
不竄點時人謂之腹藁

中宗正月晦日幸昆明池羣臣應制賦詩帳殿前結
綵樓命上官昭容選一首爲新翻御製曲紙落如飛
從臣各認名接取唯沈宋二詩不下移時一紙飛墜
乃沈詩也昭容評曰二詩工力悉敵沈落句辭氣已
竭宋猶陞健舉

羣公對雪尚隆之日、麴堆金井、誰調湯餅、吳永素曰、玉滿天山、難刻珮環、坐間服其韻精、

孟浩然學不爲儒、務掇菁藻、文不按古、匠心獨妙、間過秘書、秋月新霽、諸英華賦詩作會、浩然句曰、微雲淡河漢、疎雨滴梧桐、舉坐嗟其清絕、

皇甫湜稱退之文曰、穿天心、出月脇、

楊大年作文則與門人賓客飲博、投壺奕棋、語笑誼譁、而不妨締思、以小方紙總書、揮翰如飛、每盈一幅、則令門人傳錄、頃刻數千言、門人疲於應命、

字略謂劉景文曰某平生無快意事惟作文章意之所到則筆力曲折無不盡意自謂世間樂事無復踰此

○唐球居蜀所著寺撚稿爲圓納之大瓢中後病投瓢於江曰斯文苟不沈沒得者方知我苦心爾至新渠有識者曰唐山人瓢也接得之

○道標詩章比之潘陸當時吳興有清畫會稽有靈徹語曰嘗之畫能清秀越之徹洞冰雪杭之標摩雲霄每飛章寓韻竹夕花時彼三上人者當四面之敵右

庶子李益書云重名之下果有斯文西還京師有以
夸耀皎然字清畫湖州人謝靈運十世孫

○二博物

○漢武帝祀甘泉至渭橋有女子浴於渭乳長七尺上
恠而問之女曰帝後第七車侍中知我所來時張寬
在第七車對曰天星主祭祀者齋戒不嚴則女人星
見

○世祖大會靈臺得鼠如豹文熒熒光澤世祖異之以
問羣臣莫能知者竇攸對曰鼯鼠也見爾雅按秘書

始攸言

曰鄭玄在馬融門下三年不得相見高足弟子傳授而已嘗算渾天不合或言玄能者融召令算一轉便決衆咸駭服及玄業成辭歸旣而融有禮樂皆東之歎恐玄擅名而心忌焉玄亦疑有追乃坐橋下在水上據衾融果轉式逐之告左右曰玄在土下水上而據木此必死矣遂罷追玄竟以得免孝標曰馬融海內大儒被服仁義鄭玄名列門人親傳其業何猜忌而行鴆毒乎委巷之言賊夫人之子

○卓吾子曰或出投刺門生未可知也或如神秀之徒惠明乎此必然是盧子幹然盧植實非惡人

○玄別傳曰玄少好學書數十三誦五經好天文占候風角隱術年十七見大風起諸縣曰某時當有火災至時果然年二十一研極羣書精曆數圖緯之言兼精算術遂去師故兗州刺史第五元先就東郡張恭祖受周禮禮記春秋傳每經歷山川及接顏一見皆終身不忘扶風馬季長以英儒著名玄徃從之參考同異又不得見住左右自起精廬時涿郡盧子幹爲

門人冠首季長有不解剖裂七事玄思得五子幹得
三季長謂子幹曰吾與汝皆弗如也季長臨別執玄
手曰犬道東矣子勉之

○諸葛恪爲丹陽太守出獵兩山之間有物如小兒伸
手引人恪令持去故地卽死參佐問之恪曰此事在
白澤圖曰兩山之間有精如小兒名曰僊囊

○洛下有田穴婦欲殺夫推而下之久乃至底得穴行
數十里見人皆長三丈披羽衣如此九處最晚行至
告饑長人指中亭栢樹下有一羊令跪捋羊鬚三捋

得三珠、令食後所得珠、遂不饑、復尋穴行出交州、還洛、問茂先云、九處地僊名、九館大夫羊爲癡龍、初一珠、天地等壽、次者延年、又次者療饑而已、

○東晉漢太子太傅疎廣、行也、王莽末、廣曾孫孟達、自東海避難、元城改姓去疎之、足以爲東氏、晉博學多識、元康中、有人自嵩山下得竹簡一枚、上兩行科斗書、司空張華以問晉、晉曰、此明帝顯節陵中策文也、檢校果然、曾作雜賦諸文、文甚俳諧、三十九歲卒、元

城爲之廢市、

○孝武西邁雅樂多缺有鐔于者近代絕此器或自蜀得之皆莫之識解律徵曰此鐔于也遂依于寶周禮注以芒筒將之其聲極清

○武帝謂周捨曰君子不可求備至如柳惲可謂具美分其才藝足了十人

○陸倕所讀一徧必誦於口嘗借漢書失五行志四卷乃暗寫還之略無遺脫

○裴詵之嘗從常景借書百卷十許日卽返景疑其不能讀每卷策問應答無遺景歎曰應奉五行俱下禰

衡一覽便記今復見之裴生矣

沈約於坐策劉顯經史十事顯對其九約曰昏忘不可受策雖然聊試數事不可至十顯問其五約對其二陸倕聞之擊席喜曰劉郎可人雖吾家平原請張壯武王粲謁伯喈必無此對

○劉杳於沈約坐語及宗廟犧樽事約曰鄭玄答張逸謂爲畫鳳尾婆娑然今無復此器則不依古杳曰此言未必安古者樽彝皆刻木爲鳥獸鑿頂及背以出肉酒魏晉郡得齊手琵琶送女器有犧樽作犧牛形晉

曹疑於青州發齊景墓又得三樽形亦爲牛象皆古
遺器知非虛也沈約又云何承天纂文載張仲師及
長頸王事何所出杳曰仲師長尺二寸出論衡長頸
是毘騫王朱建安扶南記云古來至今不死約檢二
書一如杳言

王儉嘗集才學之士總校虛實類物隸之謂之隸事
使賓客隸事惟何憲爲勝乃賞以五花簾白團扇容
氣自得王攜後至儉以所隸示之曰卿能奪之乎攜
操筆便成文詞華奧舉生擊節攜乃命抽憲簾自擊

取扇登車而去。儉笑曰：「所謂大力者，負之而趨。」
○張綰與兄纘齊名，湘東王繹嘗策以百事，綰對曰：「其
六號爲百六公。」

○梁天監時，西北遠邊有白題及滑國，遣使由岷山道
入貢。二國歷代弗賓，莫知所出。裴子野曰：「漢潁陰侯
斬胡白題將一人，服皮注云：『白題，胡名也。』」又漢定遠
侯擊虜入滑，此其後乎？時服其博。

○張永開玄武湖，過古冢，上得一銅斗，有柄。文帝以訪
之朝，何承天曰：「此亡新威斗。王莽時三公亡，皆賜之。」

一在冢內一在冢外此必甄邯之墓果然

○李後主獻畫牛一畫在欄外夜歸欄中太宗以問羣臣無知者僧錄贊寧曰南倭海中方諸蚌有淚得之和色著物則畫隱而夜見沃焦山風撓嵐石落海岸得之滴水摩色染物則畫見而夜晦諸學士皆以爲無稽寧曰見張騫海外異經後杜鎬檢三館書果見於六朝舊書中

○陳彭年以博學強記受知定陵一日便殿賜坐對甚從容上問墨知墨允是何人彭年曰伯夷叔齊也上

問見何書曰春秋少陽卽令秘閣取此書旣至令於第幾版尋檢果得之上喜甚未幾擢爲執政

○蕭穎士嚴酷異常有一僕事之十餘年穎士每每加箠楚輒百餘不堪其苦人或激之使去僕曰我非不能他從所以遲留者特愛慕其博奧耳

奴猶如此何獨無人

○徐鉉博通古今時象斃取膽不獲鉉曰於前左足求之果得召問鉉對曰象膽隨四時在足今方二月故

傳弘業宰天台縣有人獵得一獸形如豕仰鼻長尾有岐謂之恠傳識之曰雖非恠也雨則懸於樹以尾塞其鼻後果驗可類子雲別鼯鼠曼倩識騶虞

熙寧初吳仲庶知成都一日文明廳前大槐枝葉出烟色青白如焚香至暮乃止而木如故楊損之云陰符經謂火生於木禍發必克疑有將士作亂而不成者月餘果有告戍卒謀亂者皆獲

人有獲玉印遺劉原父文曰周惡夫印原父曰漢條侯印尚存於今耶或疑之曰古亞惡二字通用史記

盧綰之孫他人封亞谷侯而漢書作惡谷是矣聞者
大服

8 有人問蘇文忠公曰公之博洽可學乎曰可吾讀漢
書蓋數過而始盡之如治道人物地里官制兵法貨
財之類每一過專求一事不待數過而事事精覈矣

○三談學

8 無能子之友華陽子爲所知迫以仕問無能子曰吾
將學無心久矣仕則違心不仕則念所知如何其可
也無能子曰無心不可學無心非仕不仕夫欲於中

漁樵耕牧有心。也不欲於中。帝車侯服亦有心也。故
理安於獨善。則許由善卷不恥爲匹夫。勢便於兼濟。
則堯舜不辭爲天子。其爲無心一也。

好朋友

○鄭康成在表冀州坐時汝南應劭亦歸袁因起自贊
曰故太山太守應仲遠北面稱弟子何如鄭笑曰仲
尼之門考以四科回賜之徒不稱官闕應有慙色
○傳嘏善言虛勝荀粲談尚玄遠每至共語有爭而不
相喻裴冀州釋二家之義通彼我之懷常使兩情皆

得彼此俱暢

荀奉倩諸兄並以儒術論議奉倩獨好言道常以夫子之言性與天道不可得聞然則六籍雖存固聖人之糠粃也兄侯難曰易云聖人立象以盡意繫詞焉以盡言則微言胡不可聞答曰蓋理之微者非物象之所舉也今稱立象以盡意此非通於意外者也繫詞焉以盡言此非言乎繫表者也斯則象外之意繫表之言固蘊而不出矣

亦聰明可與言也

童子魏照求入事郭泰供給灑掃泰曰當精義講書
何來相近照曰經師易獲人師難遭欲以素絲之質
附近朱藍於時泰名顯士爭歸之載刺常盈車

○何平叔以爲聖人無喜怒哀樂其論甚精鍾士季諸
人述之王輔嗣意頗不同以爲聖人茂於人者神明
也同於人者五情也神明茂故能體中和以通無五
情同故不能無哀樂以應物然則聖人之情應物而
無累於物者也今以其無累便謂其不復應物失之
遠矣世以王理爲得

亦聰明未得旨

陸士衡入洛次偃師近夕結陰投宿民居見一少年
姿神端邁與士衡言玄妙有辭致士衡心服其能既
曉辭去士衡脫驂逆旅姬曰此東數十里無村落止
有山陽王家墓耳知所遇者是輔嗣士衡由此妙達
玄理

宋處宗甚有思理嘗買得一長鳴雞籠著窓前雞遂
作人語與宋談極有致宋因此玄功大進
雞

初世爲人無可談者誓作長鳴雞以洩其憤懣乃得入宋手置窓前快哉

○衛濟川有六鶴日以粥飯啖之三年識字濟川檢書只令鶴銜取鶴一一無差

○袁藏機有三鳥大類鶴每翔空而飛呼之卽下令授人語故謂之傳語鳥

○衛玠總角時問樂令夢樂曰是想衛曰形神所不接而夢豈是想耶樂云因也未嘗夢乘車入鼠穴擣薤噉鐵杵無想無因故也衛思因經日不得遂成病樂

聞故命駕爲剖析之衛卽小差樂嘆曰此兒胸中當必無膏肓之疾

〇周禮六夢曰正夢曰噩夢曰思夢曰寤夢曰喜夢曰懼夢東坡夢齋銘曰人有牧羊而寢者因羊而念馬因馬而念車因車而念蓋遂夢曲曲蓋鼓吹身爲王公夫牧羊之與王公亦遠矣想之所因豈足恠乎李溫陵曰周公樂令蘇子皆一偏之談推測之見青天白日各自說夢不足信也無時不夢無時不夢天以春夏秋冬夢地以山川土石夢人以

六○根○來○塵○十○二○處○十○八○界○夢○夢○死○夢○生○夢○苦○夢○樂○
飛○者○夢○於○林○躍○者○夢○於○淵○夢○固○夢○也○醒○亦○夢○也○蓋○
無○不○是○夢○矣○誰○能○知○其○故○乎○雖○至○聖○至○神○於○此○無○
逃○避○夢○中○若○問○其○因○亦○當○縮○首○卷○舌○不○敢○出○聲○矣○
善○哉○衛○玠○形○神○所○不○接○之○間○也○使○得○遭○遇○達○磨○諸○
祖○豈○不○超○然○夢○覺○之○關○而○何○止○差○疾○已○也○惜○哉○好○
學○而○無○其○師○真○令○人○恨○恨○

○
殷中軍讀小品下二百籤皆是精微世之幽滯嘗欲
與支道林辯之竟不得傳曰遁居會稽晉哀帝欽其

風味遣中使至東迎之遁遂辭丘壑高步大邑語林
曰浩於佛經有所不了故遣人迎林公林乃虛懷欲
徃王右軍曰淵源思致淵富未易爲敵且已所不解
上人未必能通縱復服從亦名不益高若佻脫不合
便喪十年所保林公以爲然遂不行

耽名廢實

○于法開始與支公爭名後情漸歸支意甚不分遂遁
迹刻下更學醫術一日遣弟子過會稽時支公正講
小品開戒弟子道林講比汝至當在某品下因示語

攻難數十番。弟子如言。詣支公。正值講。因謹述開意。往反多時。林公遂屈。厲聲曰。君何足復受人寄載來。殷中軍孫安國主謝能言。諸賢悉在會稽王許。殷與孫共論易象。妙於見形。孫語道合。意氣干雲。一坐咸不安。孫理而辭不能屈。會稽王慨然歎曰。使真長來。故應有以制彼。卽迎真長。孫意已不如真長。旣至。先令孫自叙本理。孫麤說已語。亦覺殊不及向。劉便作二百許語。辭難簡切。孫理遂屈。一坐同時拊掌而笑。稱美良久。

8

褚季野語孫安國云北人學問淵綜廣博孫答曰南人學問清通簡要支道林聞之曰聖賢固所忘言自中人以還北人看書如顯處視月南人學問如牖中窺日劉孝標曰支所言但譬成孫褚之理也然則學廣則難周難周則識闇故如顯處視月學寡則易覈易覈則智明故如牖中窺日也

8

謝安年少時詣阮光祿道白馬論爲論以示謝於時謝不卽解阮語重相咨盡阮乃嘆曰非但能言人不可得在索解人亦不可得

支遁每標舉會宗而不留心象喻解釋章句或有所
漏文字之徒多以為疑謝安石聞而善之曰此九方
臯之相馬也略其玄黃取其雋逸

支道林許掾諸人共在會稽王齋頭支為法師許為
都講支通一義四坐莫不厭心許送一難眾人莫不
拌舞但共嗟詠二家之美不辯其理之所在

王逸少作會稽初至支道林在焉孫興公謂王曰支
道林拔新領異胸懷所及乃自佳卿欲見不王本自
有一往雋氣殊自輕之後孫與支共載往王許王都

領域不與交言、須臾支退後、正值王當行事、已在門、支語王曰、君未可去、貧道與君小語、因論莊子逍遙遊、支作數千言、才藻新奇、花爛映發、王遂披襟解帶、留連不能已。

○僧意在瓦罐寺中、王荀子來與共語、便使其唱理、意謂王曰、聖人有情不、王曰、無、重問曰、聖人如柱邪、王曰、如籌算、雖無情、運之者有情、僧意曰、誰運聖人邪、荀子不得答而去。

○徐遵明詣田猛略、受學一年、欲去、猛略謂曰、君年少、

從師每不終業。遵明曰：吾今知真師所在矣。
○雖是大話，亦是一句話。

○徐文遠博通六經，耆儒沈重講太學，受業常千人文。
遠從之質問曰：先生所說紙上語耳。若與境有所未
見也。

○周顒著三宗論，言空假義。智林道人言：捉麈尾來，四
十餘載，頗見宗錄。惟此塗白黑，無一人得者。非意此
音猥來入耳。

初潭集卷之十三

初潭集卷之十四

師友四

○一音樂

伯牙學琴於成連先生三年不成成連云吾師方子春在東海中能移人情乃與伯牙俱往至蓬萊山留伯牙日子居習之吾將迎之刺舡而去旬時不返伯牙延望無人但聞海水洞湧山林杳冥愴然嘆曰先生移我情矣乃援琴而歌水仙之操曲終成連回刺舡迎之以還伯牙遂爲天下妙矣

○嗟夫學道亦若是矣學人者不至舍已者未盡及至海天一色四顧無依驚恠駭愕不能以已不可致思矧可晤語自然之音見矣

○應侯與賈午子坐聞其鼓琴之聲應侯曰今日之琴一何悲也賈午子曰夫張急調下故使人悲耳急張者良材也調下者官卑也取夫良材而卑之官能無悲乎

○蔡中郎在陳留鄰人召飲比往客有彈琴者中郎至門潛聽之曰以樂召我而有殺心何也遂反將命告

主人主人自起追之中郎以告彈琴者曰我見螳螂
方向鳴蟬蟬將去而未飛螳螂爲之一前一却吾心
聳然唯恐螳螂之失蟬也中郎咲曰此足以當之矣
吳人燒桐以爨蔡邕聞火烈聲知是良木因裁爲琴
而尾猶焦故時人名爲焦尾琴

嵇康嘗遊洛西暮宿華陽亭獨坐彈琴夜分忽有客
來詣與康語辭致清辨因琴而彈爲廐陵散聲調絕
倫遂授康仍誓不傳於人

嵇中散燈下彈琴有一人入其室初時猶小斯須轉

大遂長丈餘顏色甚黑單衣草帶不復似人嵇熟視良久乃吹滅燈曰耻與魑魅爭光

嵇中散臨刑東市神氣不變索琴彈之奏廣陵散曲終曰袁孝尼嘗請學此散吾靳固不與廣陵散於今絕矣太學生三千人上書請以爲師不許

阮千里善彈琴無貴賤長幼皆爲彈神氣冲和不知向人所在內兄潘岳使彈日達夜無忤色識者知其不可榮辱也 真輕薄

戴公從東出謝太傅往看之謝本輕戴見但與論琴

書戴旣無吝色而談琴書愈妙謝悠然知其量

○彥回與王或謝莊等共聚袁粲宅初秋涼夕風月甚美彥回援琴奏別鵠之曲宮商旣調風神諧暢謝莊撫節歎曰以無累之神合有道之器宮商暫離不可得已

○鄭述祖能鼓琴自造龍吟十弄云嘗夢人彈琴寤而寫得

○宋世有嵇元榮羊蓋並善鼓琴柳吳興憚時爲齊竟陵王法曹叅軍王有謝太傅鳴琴手授吳興吳興彈

爲雅弄竟陵曰卿巧越嵇心妙臻羊體良質美手也
在今辰矣

王彥伯嘗至吳郵亭維舟理琴見一女子披帷而進
取琴調之其聲甚哀彥伯問何曲答曰此所謂楚明
光也惟嵇叔夜能爲此聲彥伯請受女曰此非艷俗
所宜惟巖棲谷隱可以自娛耳鼓琴而歌歌畢遂去
段由夫携琴就松風澗響之間曰三者皆自然之聲
正合類聚

趙師字耶利善鼓琴貞觀初獨步上京嘗云吳聲清

宛若長江廣流綿綿徐逝國士之風蜀聲躁急若激浪奔雷亦一時俊快

李龜年嘗至岐王宅聞琴曰此秦聲良久又曰此楚聲主人入問則前彈者隴西沈妍後彈者揚州薛滿洛中董氏畜雷琴一中題云山虛水深萬籟蕭蕭古無人蹤惟石黛蕤狀其聲也其外漆下隱有朱書云洛水多清泚崧高有白雲聖朝容隱逸時得詠南薰車路寶上人言嘗與其徒月夜登閣聽江貫道鼓琴貫道信乎忘言曲盡其妙於是據琴而弗彈坐客莫

不自失隆茂宗因畫爲據琴圖

煬帝將幸江都王令言子於戶外彈胡琵琶作番調
安公子曲令言時卧室中間之驚起急呼其子曰此
曲興自早晚曰頃來有之令言歛歔流涕曰汝慎無
從行帝必不返此曲宮聲往而不返帝果死江都
玄宗不好琴嘗一聽弄未畢叱琴者出謂內侍曰速
令花奴將羯鼓來爲我解穢明皇好羯鼓有汝陽王
花奴尤善此伎時戴砑絹帽子上安葵花曲終花不
落

桓南郡作詩或思不來輒作鼓吹旣而思得云鳴鵲
響長阜歎曰鼓吹固自來人思

馬周上言令金吾每街隅懸鼓夜擊以止行李被盜
竊時人遂呼爲鼕鼕鼓有道人裴修戲爲詞曰遮莫
鼕鼕鼓須傾滿滿杯金吾若相問報道玉山頽

晉平公鑄大鐘使工聽之皆以爲調師曠曰不調請
更鑄平公曰工皆以爲調矣師曠曰後世有知音者
將知鐘之不調也臣竊爲君耻之至於師涓而果知
鐘之不調也

○太常缺黃鐘鑄不能成李嗣真居崇業里疑土中有之弗得其所道逢一車鐸聲甚厲嗣真曰官聲也市以歸振於空地若有應者掘之得鐘衆樂遂和

○元豐間命楊傑定樂傑欲銷王朴舊鐘詔不許令輔臣至太常按試傑令擇朴敝鐘陳之有樂工不平夜潛易去明日輔臣至傑厲聲曰朴鐘甚不諧使工扣之音韻更佳乃大沮

○燕有黍谷地美而寒不生五穀鄒衍吹律而溫氣至左思賦寒谷豐黍吹律以煖之是也

劉越石爲胡騎圍數重城中窘迫無計劉始久無
登樓清嘯胡賊聞之皆淒然長歎中夜吹胡笳賊皆
流涕向曉又吹賊并起圍去

荀勗善解音聲時論謂之闇解遂調律呂正雅樂每
至正會殿庭作樂自調宮商無不諧韻阮咸妙賞時
謂神解每公會作樂而心謂之不調勗意思之遂出
阮爲始平太守後有田父耕於野得周時玉尺便是
天下正尺荀試以校已所治鐘鼓金石絲竹皆覺短
泰於是伏阮神識

李舟好事嘗得村舍煙竹堅如鐵石截爲笛以遺李
牟吹笛天下第一嘗月夜泛江吹之寥亮逸發俄
有客呼舡同載旣吹笛其音清壯山石可裂牟平生
未嘗見也及入破呼吸盤辟而此笛應指粉碎客散
不知所之

伏滔長笛賦叙曰予同僚桓子野有故長笛傳之耆
老者蔡邕伯喈之所製也初邕避難江南宿於柯亭
之館以竹爲椽邕仰眎之曰良竹也取以爲笛音聲
獨絕故歷代傳之而不幸折於孫綽妓之手惜哉

王子猷在渚下舊聞桓伊善吹笛而不相識過桓於岸上過王便令人與相聞云聞君善吹笛試爲我一奏桓時已貴顯素聞王名即便回下車踞胡床爲作三調弄畢便上車去客主不交一言

王國寶構謝太傅於孝武太傅患之一日帝召桓子野飲命桓吹笛桓卽爲一弄放笛云臣於箏雖不及笛然自足以韻合歌管請以箏歌臣有一奴善吹笛并請召之帝善其調達乃令召奴旣吹笛桓便撫箏而歎曹子建詩曰爲君旣不易爲臣良獨難忠信

事不顯乃有見疑患周旦佐文武金縢功不刊推心
輔王室二叔反流言聲節慷慨俯仰可觀太傅泣下
沾襟乃越席就之解其髮曰使君於此處不凡
喻明仲妙於長笛持節數郡每出按行至山水佳處
馬上臨風輒快作數弄
桓子野每聞清歌輒喚奈何謝公聞之曰子野可謂
一往有深情

○張湛好於齋前種松栢袁山松出遊好令左右作挽
歌時人謂張屋下陳屍索道上行殯

○北人舊有行路難曲辭頗疎質袁山松好之乃爲文
其章句婉其節制酒酣而歌聽者莫不流涕初羊曇
嘗唱樂桓伊能挽歌及山松以行路難繼之遂爲三
絕

○張麟酒後挽歌甚悽苦桓車騎曰卿非田橫門人何
乃頓爾至致麟湛小字也譙子法訓云有喪而歌者
或曰彼爲樂喪也可乎譙子曰書云四海遏密八音
何樂喪之有然則喪有挽歌何以哉譙子曰周聞之
高帝召齊田橫至於尸鄉亭自刎奉首從者挽至於

官不敢哭而不勝哀故爲歌以寄哀音彼則一時之爲也鄰有喪春不相杵挽人銜枚執樂喪者邪劉氏曰按莊子緇謳所生必於斥苦司馬彪注曰緇引柩索也斥疎緩也苦用力也引緇所以有謳歌者爲人有用力不齊故促急之也春秋左氏傳曰魯哀公會吳伐齊其將公孫夏命歌虞殯杜預曰虞殯送葬歌示必死也史記絳侯世家曰周勃以吹簫樂喪然則挽歌之來久矣非始起於田橫也

樂工廉郊常池上彈菱賓調忽聞芰荷間有物跳躍

出岸乃方響一片識者知其義賓鐵也指揆精妙致律呂相應物類相感如此

○二藝術

○軒轅時赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星景星者天精也狀如半月生於晦朔助月爲明王者不私人則現

○晉天文志金雞星見必有大赦自後京師肆赦必立雞竿

○周騰字叔達爲御史桓帝欲南郊平明將出叔達仰首曰今宮中策馬星不動帝何出焉四更皇太子卒遂止

○河南張楷字公超好道術居華陰能作五里霧。○西人裴優亦能作三里霧。

○孔子使子貢往外而未來弟子占之遇鼎皆言無下足不來顏子曰無足者乘舟而來賜至矣清朝子貢乘舟而至

○張偉康嘗夢得大象以問萬雅雅曰君當爲大郡而

不善也象大獸也然象以齒喪身相牾裁衣後爲吳郡果爲沈充所殺

幽州刺史張亮初有薛琬夢亮於山上挂絲覺而告亮曰山上絲是幽字君爲幽州乎未期而受

王早晨立門內遇卒風振樹語客曰依法當有千里外急使日中時兩馬赤白從西南來至卽取我不聽與妻子別早卽入召家人沐浴帶書囊出門候日中至果促上馬詣大武行宮時涼州未克也

張裕曾祖澄當葬父郭璞爲占墓地曰葬某處年過

百歲位至三司而子孫不蕃其處年幾減半位裁卿校而累世貴顯澄乃葬其劣處位光祿年六十四子孫遂昌

○晉初渡江王導卜其家世郭璞云淮流竭王氏滅及陳亡之年淮流竭曩時王氏人物掃地矣

○晉明帝解占塚宅聞郭璞爲人葬帝微服往看因問主人何以葬龍角此法當滅族主人曰此葬龍耳不出三年當致天子帝問爲是出天子耶答曰非出天子能致天子問耳

郭景純過江居於暨陽墓去水不盈百步時以爲近水景純曰將當爲陸今沙漲桑田水去墓數十里詩曰北阜烈烈巨海混混壘壘三墳唯母與昆

浮圖泓師與張說市宅戒無穿東北隅他日惟宅氣索然視東北隅已穿二坎驚曰公富貴一世而已諸子將不終說欲平之泓師曰客土無氣與地脉不連譬身瘡病補他肉無益也

晉隗炤善易臨終謂妻子曰後五年詔使龔負吾金以吾所書板告之後如其言使者惘然取著筮之卦

8

成曰妙哉隗生吾不負金賢夫自藏金以待太平知
吾善易書板寄意金五百斤盛以青甕埋在堂屋去
壁一丈入地九尺掘之得金 奇

王丞相令郭璞試作一卦卦成郭意色甚惡云公有
震厄王問有可消伏理不郭曰命駕西出數里得一
栢樹截斷如公長置牀上常寢處災可消矣王從其
語數日中果震栢粉碎子弟皆稱慶大將軍云君乃
復委罪於樹木

8郭能脫王震厄而不能自脫日中厄何哉豈其可

脫與否一由數定公但能預知之者耶

○上林嘗獻棗上以所持杖擊未央前殿檻呼朝曰叱
叱先生來來先生知此筐中何等物也朔曰上林獻
棗四十九枚上曰何以知之對曰呼臣者上也以杖
擊檻兩木兩木林也來來者棗也叱叱者四十九也
○詹何坐弟子侍有牛鳴於門外弟子曰是黑牛也而
白題詹何曰然是黑牛也而白其題使人視之果黑
牛而以布裹其題

○王處訥通星曆之學太宗時贊寧撰僧史十卷充史

館編修壽八十四處訥推其命孤薄三命禽略六壬遁甲俱無重貴處謂寧曰師生時正得天貴星臨門必有烈士侯王在戶不寧曰某生時錢文穆王詣寧安至門雨作避於茅檐者久之浣浴襴籍徘徊方去安定嵩真明筭術成帝時人真常筭其年壽七十三綏和元年正月二十五日晡時死書其壁以記之二十四日晡時死其妻曰見其筭時長下一筭欲以告之慮脫有肯今果校一日真又曰北邙青隴上孤櫬之西四丈所鑿之入七尺吾欲葬此地及真死依言

往掘得古時空榔卽以葬焉

○趙達治九宮一筭之術能應機立成對問若神至許飛蝗射隱伏無不中或難達飛者不可校此妄爾達使其人取小豆數斗播之席上立處其數驗覆舉信達嘗過知故爲之具食食畢謂曰倉卒乏酒肴也達因取盤中簋箸再三縱橫之乃言卿東壁有美酒一斛又有鹿肉三斤主人大笑曰以卿善射故以相試遂出酒肉酣飲

○晉陽館中有一蠕蠕客同館胡沙門指語綦母懷文

云此人有異筭術時庭中棗樹方實令兩筭即知其數并赤白若干惟少一子筭者曰必不少但更撼之果落一實

○李寬爲常侍門下盧生語人曰據公面部所無者三無子無宅無家公數子皆先公卒有宅未嘗還鄉死棄舟歸舟破骨沉

○李嶠昆弟皆年三十卒母惡之以嶠問袁天綱袁答曰神氣清秀苦壽不永耳因請連榻而寢視嶠睡鼻息候其出入在耳中遂賀曰是龜息也必大貴壽

8

蒲元性多奇思於斜谷口爲諸葛武侯鑄刀三千口
刀成言漢水鈍弱不任淬用蜀江爽烈是大金之元
精命人於成都取江水蒲以淬刀言雜涪水不可用
取水者得言不雜蒲以刀畫水言雜八升取水者叩
頭云於涪津覆水遂以涪水八升盆之尋以竹筒納
鐵珠滿中舉刀斷之應手虛落名曰神刀

8

祖冲之以諸葛亮有木牛流馬乃作一器不因風水
施機自運不勞人力又造千里船於新亭江試之日
行苗餘里子暉之亦有巧思當其詣微之時雷霆不

能入常行遇徐勉以頭觸之勉呼乃覺

○陵雲臺樓觀精巧先稱平衆木輕重然後造構乃無錙銖相負揭臺雖高峻常隨風搖動而終無傾倒之理魏明帝登臺懼其勢危別以大材扶持之樓卽頽壞論者謂輕重力偏故也

○宋河中府浮梁用鐵牛八維之一牛且數萬觔治平中水暴漲絕梁牽牛沒於河募能出之者真定僧懷丙以二大舟實土夾牛維之用大木爲權衡狀鈎牛徐去其土舟浮牛出轉運使張燾以聞賜之紫衣

長安巧工卞緩作卧褥香爐爲機環轉運四周而爐體常平可置之被褥又有九層博山香鑪縷爲奇禽怪獸窮諸靈異皆自能運動

曹公作欹案卧視書六朝人作隱囊柔軟可倚又勝欹案王維詩隱囊紗帽坐彈棋

齊卞敬家無患枕贊云爰茲素朴名爲吉始匠人製斯以獻君子無患木名程雅問櫨木曰無患何也曰音有神巫曰淫眊能符効百鬼得鬼則以此木爲棒棒殺之世人相傳以爲器用厭鬼故曰無患

○柳士隆雙鎖爲士品第一自云馬稍第一清談第二
彈琴第三又善卜別龜甲價至一萬

○彈棋始自魏宮內用妝奩戲文帝於此戲特妙用手
巾角拂之無不中。有客自云能帝使爲之客著葛巾
角低頭拂棋妙踰於帝

○王中郎以圍棋是坐隱支公以圍棋爲手談

○魏甄琛舉秀才入都頗事奕棋夜夜令蒼頭執燭或
睡頓則加箠杖奴曰郎君辭父母求仕宦若讀書執
燭所不敢辭今如此日夜不息是豈向京之意哉琛

悵然慚遂假書於許赤彪聞見日富

○可恨不載奴姓名

○李納性卞急而酷嗜奕棋每下子極寬緩有時躁怒家人客以棋具置前便忻然取子布筭都忘其恚

○荀勗嘗在晉武帝座上食荀進飯謂在坐人曰此是勞薪炊也坐者未之信密遣問之實用故車脚

○楊宣爲河內太守行縣有羣鵲鳴桑樹上宣曰前有覆車粟此鵲相隨欲往食行數里果有覆車粟

○廣漢陽翁律能聽鳥獸之音乘寒馬之野田間有放

馬者相去里許，鳴聲相聞。翁偉謂其御曰：「彼放馬目眇，其御曰：『何以知之？』」曰：「罵此轅中蹇馬，蹇馬亦罵之。」曰：「眇馬御者不信，往視之。」馬目果眇。

王武子嘗乘一馬，著連錢障泥，前有水，終日不肯渡。王云：「此必是惜障泥，使人解去，便徑渡。」語林曰：「武子性愛馬，亦甚別之。故杜預道：『王武子有馬癖。』和長與有錢癖。武帝問杜預卿有何癖，對曰：『臣有左傳癖。』」薛翁者，長安善相馬者也。於邊郡求得駿馬，騎以入市，去來人不見也。後勞問之，因請觀馬。翁曰：「諸卿無

目不足示也。伯樂相馬經云：馬生下皆地無毛，行千里，尿舉一脚，行五百里，鬬筋堅者千里，膝如團，麤千里，三軍莫逐，但知所發，不知所宿。一云：蹄團如麤。

○帝昇有窮氏，與吳賀北游。賀使昇射雀，曰：生之乎，殺之乎？賀曰：射其左目。昇引弓射之，誤中右目，抑首而愧，終身不忘。安得不精。

○楚王有白鰻，王自射之，則搏矢而熙，使養由基射之，始調弓矯矢，未發而鰻擁柱號矣。

賈堅嘗弓三石餘烈祖以堅善射親試之乃取一牛置百步上召堅曰能中之乎堅曰少壯之時能令不中今已年老正可中之恪大笑射發一矢拂脊再矢摩腹皆附膺落毛上下如一恪曰復能中乎曰所貴者以不中爲奇中之何難堅時年六十餘矣

斛律金嘗命子孫射而觀之泣曰明月豐樂用弓不及我諸孫又不及明月豐樂世衰矣每令出田還效所獲光獲少必麕龜達腋羨獲多非要害之處光恒蒙賞羨或被捶人問之曰明月必背上著箭豐樂隨

處卽下手數雖多去兄遠甚矣

郝惜信道甚精勤常患腹內惡諸醫不可療聞于法
開有名往迎之旣來便脉云君侯所患正是精進太
過所致耳合一劑湯與之一服卽大下去數段許紙
如拳大剖看乃先所服符也晉書曰法開嘗行莫投
主人妻產而兒積日不墮法開曰此易治耳殺一肥
羊食十餘臠而鍼之須臾兒下羊膾裹兒出其精妙
如此

殷中軍妙解經脉中年都廢有常所給使忽叩頭流

血浩問其故云有死事終不可說詰問良久乃云小
人母年垂百歲抱疾未久若蒙官一脉便有活理訖
就屠戮無恨浩感其至性遂令昇來爲診脉處方始
服一劑湯便愈於是悉焚經方

○梁武九錫之出范雲忽中疾居二日半召徐文伯視
文伯曰緩之一月乃復欲速卽時愈政恐二年不可
復救雲曰朝聞夕死而况二年乃下火而牀焉重衣
以覆之有頃流汗旣起二年果卒

先主因食飴喉中噎醫莫能爲吳廷紹獨謂當用楮

實湯一服疾良已。馮延巳苦腦中痛延紹密詰厨人曰相公平日嗜何等曰多食山雞鵝鵒延紹曰吾得之矣投以甘豆湯亦愈或叩之答曰噎因甘起故以楮實湯治之。山雞鵝鵒皆食烏頭半夏故以甘豆湯解其毒。

8 徐秋夫能醫嘗夜中有鬼呻吟聲甚悽愴秋夫問何須答言某家在東陽患腰痛死雖爲鬼痛猶難忍請療之秋夫問云何厝法鬼請爲芻人按孔穴鍼之秋夫如言爲灸四處又鍼有井三處設祭埋之明日見

一人來謝忽不見

○梁武發熱服大黃姚僧垣曰大黃快藥至尊年高不宜輕用帝弗從遂至危篤及梁元有心腹病諸醫請用平藥僧垣曰脉洪實宜用大黃帝從之果下宿食而疾愈

○許胤宗仕陳爲新蔡王外兵叅軍王太后病風不能言醫家告窮胤宗曰餌液不可進卽以黃耆防風煮湯數十斛置牀下氣如霧重薄之是夕語

秦王俊有疾上召許智藏治之王夢其亡妃崔氏泣

曰本來相迎許智藏至當必相苦奈何明夜俊又夢
曰妾得計矣當入靈府中避之及智藏至爲俊診脉
曰疾已入心當卽發癰不可救也俊果數日薨

○三書畫

○神農因嘉禾八穗乃作穗書頒時令

○濕水經大翻小翻山南高巒截雲層陵斷霧郡人王
次仲少有異志弱冠變蒼頡舊文爲今隸始皇時官
務煩多以次仲所易文簡便於事要奇而召之三徵
而不至始皇怒令檻車傳送次仲首發於邁化爲大

鳥翻飛而去落三翮於斯山故其峰巒有大翮小翮之名矣

漢靈帝時師宜官隸書爲最大則一字徑丈小則方寸千言或時不持錢詣酒家因書其壁顧觀者以雙酒討錢足以滅之

杜度妙於章草崔瑗崔寔父子繼能羅暉趙襲亦能此藝襲與張芝相善故芝云上比崔杜不足下方羅趙有餘

崔瓊亦玉善章草師於杜度點畫之間莫不調陰陽

袁昂評其書如危峰阻日孤松一枝王隱謂之草賢
○張芝字伯英高尚不仕善草書精勁絕倫家之衣帛
必先書而後練臨池學書池水盡墨人謂草聖芝弟
昶黃門侍郎今世云芝草者多是昶作

○劉德升字君嗣桓靈之世以造行書擅名旣以草創
亦甚妍美風流婉約獨步當時胡昭鍾繇並師其法
而胡書體肥鍾書體瘦亦各有君嗣之美

8 鍾繇少隨劉勝往抱犢山學書二年比還見蔡邕筆
法於韋誕苦求不與及誕死盜開其墓得之嘗曰用

筆者天也、流美者地也、非凡庸所知、臨終探囊以授
子、會曰、吾精思學書、學其用筆、若與人居、畫地廣數
步、卧畫被穿過表、如廁、至於忘歸、見萬類皆畫像之
鍾繇弟子宋翼每畫一波三折筆、作一戈如百鈞弩、
作一點如高峰墮石、作一牽如百歲枯藤、作一放縱
如驚蛇入草、此三折書法、

○韋仲將能書、魏明帝立陵霄觀、誤先釘榜、乃籠盛誕
轆轤長組引上、使就題之、去地二十五丈、誕甚危懼、
既下、頭鬢皓然、乃戒子孫、絕此楷法、著之家令、

故以蔡中郎殉葬也

○歐陽率更行見古碑是索靖所書駐馬觀之良久而去數百步復還下馬佇立疲倦則席地坐觀因宿其下三日乃去

○衛夫人曰學書者執筆爲先真書者一寸二分行草書去筆三寸一分執之下筆點畫波撇屈曲皆須盡一身之力而送之

○庾翼與右軍書曰吾昔有伯英草草十紙過江亡失嘗嘆妙迹永絕忽見足下答家兄書煥若神明頓還

舊觀

王子敬好書、觸遇造玄、嘗日戲北館、取掃帚沾泥汁、中以書壁、作方丈一字、晻曖斐亾、極有好勢、右軍甚歎其美、作書與所知云、子敬飛白大有直

羊欣父不疑爲烏程令、時王猷之爲吳興守、見欣愛之、嘗入縣、見欣著新練裙、晝寢、遂書裙數幅而去、欣本攻書、因之彌善、沈約云、羊敬元長隸書、子敬之後、可以獨步、故時人語曰、冒王得羊、不失所望、會稽王世子元顯每使書扇、羊不奉命、元顯怒、以爲後軍舍

人此職本用寒人羊意安恬不爲卑已。

○齊高帝善書謂王僧虔曰誰爲第一對曰臣書第一陛下亦第一帝笑曰卿可謂善自爲謀。

○梁江夏王鋒四歲卽倚井欄爲書書滿洗去復更書晨興不拂窓塵先於塵上書至五歲高帝使學鳳尾書一學卽工帝大悅以玉麒麟賜之曰麒麟儼鳳尾也。

武帝雅重蕭子雲嘗曰筆力駿勁心手相應巧逾杜度美過崔寔當與元常並驅爭先後出爲東陽太守。

百濟國使人來求書逢子雲維舟將發使人望船三十餘步拜行而前子雲乃爲停船三日書三十紙與之獲金貨數百萬

○丁覲與智永同時世稱丁真永草

僧懷素曰學無師授如不由戶而欲出乃師金吾兵曹錢塘烏彤謂之曰草書古勢多矣惟太宗以獻之書如凌冬枯樹寒寂勁硬不置枝葉張長史亦謂彤曰孤蓬自振驚沙坐飛余師而爲故得奇惟凡草聖盡於此矣懷素不復應對但連叫數十聲曰得之矣

經歲餘辭去彤又曰草書豎牽似古釵脚勉旃至晚
歲顏太師以懷素爲同學鄔兵曹弟子問曰夫草書
於師授之外須自得之張長史覩孤蓬驚沙之外見
公孫大娘劒器舞始得低昂迴翔之狀未知鄔兵曹
有之乎懷素對曰似古釵脚爲草書豎牽之極真卿
微笑經歲不言懷素又辭去真卿曰師豎學古釵脚
何如屋漏痕懷素抱顏公脚唱賊賊久之真卿徐問
曰師亦有自得乎對曰夏雲多奇峰夏雲因風變化
初無定勢又遇壁折之路一一自然顏公曰噫草聖

淵妙代不乏人可謂聞所未聞之旨矣懷素俗姓錢伯祖惠融禪師亦學書故鄉中號爲大錢師小錢師米元章嘗謁蔡攸於舟中攸出右軍王略帖示之元章驚嘆求以他書相易攸有難色元章曰若不見從某卽投此江死矣因大呼據船舷欲墮攸遂與之○如此好書安得不好凡事皆然靡不成者

○陳寺丞伯修之子也好學書嘗於枕屏效米元章筆迹書杜陵詩一日元章過之見而驚焉因授以作字提筆之法曰以腕著紙則筆端有指力無臂力也曰

提筆亦可作小楷乎、元章笑顧小史索紙書其所作
進黼宸贊表筆畫端謹字如蠅頭而位置規模皆若
大字父子相顧歎服因請其法元章曰此無他惟自
今以往每作字時不可一字不提筆久久當自熟矣
○胡汲仲謂趙子昂上下五百年縱橫一萬里舉無此
書

○趙子固目姜堯章爲書家申韓

○神怡務閒一合也感物循知二合也時和氣潤三合
也紙墨相發四合也偶然欲書五合也心遽體留一

垂也、意違勢屈、二垂也、風燥日炎、三垂也、紙墨不稱、四垂也、情怠手闌、五垂也、

○盧杞與馮盛相遇於道、各携一囊、杞發盛囊、有墨一枚、杞大笑、盛正色曰、天峰煤和針魚腦、入金谿子手中、錄離騷古本、比公日提綾文刺三百、爲名利奴、顧當孰勝已、而搜杞囊、果是三百刺、

○子瞻云、未知一生當著幾兩屐、吾有墨七十枚、而猶求取不已、石昌言畜李廷珪墨、不許人磨、或戲之云、子不磨墨、墨將磨子、今昌言墓木拱矣、而墨故無恙、

李公擇見墨輒奪卿相間抄取殆遍此亦通人之一蔽也

○趙光逢薄遊襄漢濯足谿上見一方輓類碑上題字云髡友退鋒郎功成鬢髮傷冢頭封馬鬣不敢負恩光獨孤貞節立輓後積土如盎微有苔蘚蓋好事者瘞筆所在

○舒雅得海螺甚奇以簡獻於韓熙載云海中有無心班道人往詩門下書林糙澀逆意可使道人馴之卽證發光地菩薩

王安石進字說表曰、蓋聞物生而有情、情發而爲聲、聲以類合、皆足相知、人聲爲言、述以爲字、字雖人之所制、本實出於自然、故上下內外、初終前後、中偏左右、自然之位也、衡、袞、曲、直、耦、重、交、折、反、缺、倒、及、自然之形也、發、歛、呼、吸、抑、揚、合、散、虛、實、清、濁、自然之聲也、可視而知、可聽而思、自然之義也、以義自然、故仙聖所宅、雖殊方域、言音乖離、點畫不同、譯而通之、其義一也、道有升降、文物隨之時變、事異書名、或改原出、要歸亦無二焉、乃若知之所不能與、思之所不能至、

則雖非卽此而可證亦非舍此而能學蓋惟天下之
至神爲能究此

○漢桓帝時劉褒畫雲漢圖見者覺熱又畫北風圖見
者覺寒

是真實語雅盡形容

○孫權使曹再興畫屏風誤落筆點素因就成蠅權疑
其真以手彈之王右丞詩屏風誤點惑孫郎團扇草
書輕內史

○魏明帝遊洛水水中有白鰲數頭美靜可憐見人輒

去帝欲見之終莫能遂侍中徐景山曰獺嗜鯢魚乃不避死畫板作兩生鯢魚懸置岸上於是羣獺競逐一時執得

○白獺數頭常遊洛水美靜可憐見人輒去徐畫固精白獺善嗜夫人亦然總不避死

○鍾會是荀濟北從舅二人情好不協荀有寶劍可直百萬常在母鍾夫人許會善書學荀手跡作書與母取劍仍竊去不還荀最知是鍾而無由得也思所以報之後鍾兄弟以千萬起一宅始成甚精麗未得移

住荀極善畫乃潛往畫鍾門堂作太傅形像衣冠狀貌如平生二鍾入門便大感動宅遂空廢世語曰會善學人書伐蜀之役於劔閣要鄧艾章表皆約其言令詞旨倨傲多自矜伐艾由此被收也

戴安道就范宣學視范所爲范讀書亦讀書范鈔書亦鈔書唯獨好畫范以爲無用不宜勞思於此戴乃畫南都賦圖范看畢咨嗟甚以爲有益始重畫

謝太傅云顧長康畫有蒼生來所無續晉陽秋曰愷之好丹青曾以一厨畫寄桓玄皆其絕者深所珍惜

悉糊題其前、桓乃發厨、後取之、愷之見、封題如初、而畫並不存、直云妙畫通靈變化而去、如人之登仙矣、○只得如此道、亦畢竟是變化去也、

七 顧長康道畫手揮五弦、易目送歸鴻、難

留譜與人

戴安道中年畫行象甚精、庾道季看之語戴云、神明太俗、由卿世情未盡、戴云、唯務光當免卿此語、卓吾子曰、此答未善、予因代答一轉語云、與俗人看便是真俗

○顧長康畫裴叔則頰上益三毛人問其故顧曰裴楷
儁朗有識具正此是其識具看畫者尋之定覺益三
毛如有神明殊勝未安時

○顧長康好寫起人形欲圖殷荊州殷曰我形惡不煩
耳顧曰明府正爲眼爾但明點童子飛白拂其上使
如輕雲之蔽日

○顧長康畫謝幼輿在巖石裏人問之顧曰謝云一丘
一壑自謂過之此子宜置丘壑中

○顧長康畫人或數年不點目睛人問其故顧曰四體

妍蚩本無關於妙處傳神寫照正在阿堵中

○

蕭貢是竟陵王子良之孫有文才善書畫嘗於扇上
圖山水咫尺之間便覺萬里矜慎不傳自娛而已

○○

閻立本善畫至荊州見張僧繇舊迹曰虛得名耳明
日再往曰猶近代佳手後日又再往曰名下定無虛
士因坐卧觀之留宿其下宣和畫譜曰張僧繇嘗於
金陵安樂寺畫四龍不點目睛謂點之則驤騰而去
人以為誕固請點之因為落墨纔及二龍果雷電破
壁徐視畫已失矣

○○唐明皇忽思嘉陵江山水假吳生驛遞令往寫貌及
回帝問之道玄云臣無粉本並記在心卽令於大同
殿圖之嘉陵江山水一日而就時有李將軍山水擅
名亦畫大同殿數月方畢上曰李思訓數月之功吳
道玄一日之跡各極其妙也

○○吳道玄嘗畫殿內五龍鱗甲飛動每欲大雨卽生烟
霧

○○蜀張南本與孫位並學畫水南本以爲同能不如一
勝去而畫火獨得其妙嘗畫辟支佛於火中結跏趺

坐煙飛電掣烈烈有焚林燎原之勢而佛以定慧力
安然不動李廌爲偈曰大士坐禪心若水月火周其
身熾焰炎烈靜觀無始火本不熱

○張垂崖鎮蜀雅聞孫知微名欲與相見一日聞知微
在僧舍亟捐車騎詣之知微卽投閣遁去後垂崖還
朝路出劔閣逢一村童負篋迎於道左曰適一山人
以書投我曰公所喜者畫也謹以爲獻公知是知微
卽問童子所在童子曰去已遠矣及馬知節來守成
都與知微游處甚好得其畫甚多馬解金帶贈孫孫

繫金帶、穿袍上人見其標韻蕭散、白衣金帶皆以爲
孫思邈、李太白復出也。

郭恕先仕於朝、跡弛不羈、放浪玩世、卒以傲恣流竄、
海島中道仆地、蹤形仙去、其爲樓居、仙圖蕭散、簡遠
無塵埃氣、子瞻爲之贊、長松參天、蒼壁插水、縹緲飛
觀、憑欄誰子、空蒙寂歷、烟雨滅沒、恕先在焉、呼之或
出。

初潭集卷之十四

卷之十四

三